

MINISTARSTVO ZDRAVSTVA ZENIČKO-DOBOJSKOG KANTONA

Na osnovu člana 8. Zakona o ministarskim, vladinim i drugim imenovanjima Federacije Bosne i Hercegovine („Sl. novine FBiH“, broj: 12/03, 34/03 i 65/13), člana 23. stav 1. tačka e), u vezi sa članom 3. i 17. Odluke o utvrđivanju standarda i kriterija Vlade Zeničko-dobojskog kantona za imenovanja/nominiranja na upražnjenu poziciju u reguliranim tijelima Zeničko-dobojskog kantona („Sl. novine Zeničko-dobojskog kantona broj: 4/15, 7/15 i 11/16) u postupku izbora i imenovanja dva člana Upravnog odbora JU Kantonalna bolnica Zenica, predstavnika stručnih radnika zdravstvene ustanove, Ministarstvo zdravstva Zeničko-dobojskog kantona objavljuje

JAVNI OGLAS

za izbor i imenovanje dva člana Upravnog odbora JU Kantonalna bolnica Zenica, predstavnika stručnih radnika zdravstvene ustanove

Objavljuje se javni oglas za izbor i imenovanje dva člana Upravnog odbora JU Kantonalna bolnica Zenica, na poziciju:

- predstavnika stručnih radnika zdravstvene ustanove,
- predstavnika stručnih radnika zdravstvene ustanove iz reda zdravstvenih radnika.

Članovi Upravnog odbora JU Kantonalna bolnica Zenica, imenuju se na period do isteka mandata konačno imenovanog Upravnog odbora.

Članovima Upravnog odbora JU Kantonalna bolnica Zenica, predstavnika stručnih radnika zdravstvene ustanove, pripada naknada za rad u Upravnom odboru u skladu sa članom 1. stav 1. tačka a) Odluke o visini naknade predsjednicima i članovima upravnih odbora kantonalnih zdravstvenih ustanova i Zavoda zdravstvenog osiguranja Zeničko-dobojskog kantona („Sl. novine Zeničko-dobojskog kantona“, broj: 7/15).

Opis pozicije

Djelokrug rada upravnog odbora propisan je članom 65. Zakona o zdravstvenoj zaštiti („Sl. novine FBiH“, broj: 46/10 i 75/13).

Upravni odbor donosi statut, imenuje i razrješava direktora, odnosno v.d. direktora zdravstvene ustanove, utvrđuje planove rada i razvoja zdravstvene ustanove, utvrđuje godišnji program rada, donosi finansijski plan i usvaja godišnji obračun, donosi opće akte o unutrašnjem uređenju i sistematizaciji poslova i druge opće akte u skladu sa zakonom i statutom zdravstvene ustanove, odlučuje o svim pitanjima obavljanja djelatnosti radi kojih je zdravstvena ustanova osnovana, ako zakonom nije određeno da o određenim pitanjima odlučuje drugi organ zdravstvene ustanove, usmjerava, kontroliše i ocjenjuje rad direktora, rješava sva pitanja odnosa sa osnivačem, odlučuje o korištenju sredstava preko iznosa utvrđenog statutom zdravstvene ustanove, odgovara osnivaču za rezultate rada zdravstvene ustanove, odlučuje o prigovoru zaposlenika na rješenje kojim je drugi organ, određen statutom zdravstvene ustanove, odlučio o pravu, obavezi i odgovornosti zaposlenika iz radnog odnosa, podnosi osnivaču najmanje jedanput godišnje izvještaj o poslovanju zdravstvene ustanove i vrši druge poslove u skladu sa zakonom i statutom zdravstvene ustanove.

Kandidati za imenovanje na poziciju člana Upravnog odbora JU Kantonalna bolnica Zenica, obavezni su ispunjavati opće i posebne uvjete.

Opći uvjeti za imenovanje

Kandidat za imenovanje u Upravni odbor obavezan je ispunjavati sljedeće opće uvjete:

1. da je državljanin Bosne i Hercegovine,
2. da je stariji od 18 godina,
3. da nije otpušten iz državne službe kao rezultat disciplinske mjere (bilo na nivou države ili entiteta) u periodu od tri godine prije dana objavljivanja upražnjene pozicije,
4. da nije obuhvaćen članom IX stav 1. Ustava Bosne i Hercegovine,
5. da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima FBiH ("Sl. novine FBiH", broj: 12/03, 34/03 i 65/13),
6. da nije član organa zakonodavne, izvršne ili sudske vlasti ili savjetnik u smislu Zakona o sukobu interesa u organima vlasti u Federaciji Bosne i Hercegovine („Sl. novine FBiH“, broj: 70/08),
7. da nema privatni i/ili finansijski interes u zdravstvenoj ustanovi u čiji se upravni odbor kandiduje,
8. da nije osuđivan za krivično djelo nespojivo sa imenovanjem u upravni odbor, pet godina od dana pravosnažnosti presude, isključujući vrijeme zatvorske kazne,
9. da mu nije izrečena zaštitna mjera zabrane obavljanja aktivnosti, tri godine od dana pravosnažnosti odluke o izrečenoj zaštitnoj mjeri.

Posebni uvjeti za imenovanje

Kandidat za imenovanje u Upravni odbor obavezni su ispunjavati sljedeće posebne uvjete:

1. VSS, VII stepen stručne spreme, dokaz o završenom visokom obrazovanju, odnosno prvog (najmanje 240 ECTS bodova) drugog ili trećeg ciklusa Bolonjskog sistema studiranja,
2. najmanje 5 godina radnog iskustva u struci,
3. da nije član nadzornog odbora ili upravnog odbora, odnosno odbora za reviziju u više od jednog privrednog društva,
4. komunikacijske i organizatorske sposobnosti,
5. sposobnost tumačenja ekonomskih, tehnoloških i pravnih analiza i propisa
6. rezultati rada ostvareni tokom poslovne karijere posebno u oblasti zdravstva i zdravstvenog osiguranja.

Potrebni dokumenti

Prijave kandidata na javni oglas treba da sadrže: kraću biografiju, adresu, kontakt telefon i naznaku na koju poziciju u Upravni odbor se kandidat prijavljuje (predstavnik stručnih radnika ili predstavnik zdravstvenih radnika).

Uz prijavu na javni oglas kandidati su obavezni dostaviti originalne dokumente ili ovjerene kopije dokumenata kao dokaz o ispunjavanju općih i posebnih uvjeta i to:

1. diplomu,
2. uvjerenje o državljanstvu ne starije od 6 mjeseci ili ovjerenu kopiju lične karte,
3. dokaz o radnom iskustvu na poslovima svog stručnog zvanja,
4. ovjerenu izjavu kandidata iz tačke 3. 4. 5. 6. i 7. „Općih uvjeta za imenovanje“ i tačke 3. „Posebnih uvjeta za imenovanje“.

5. uvjerenje da kandidatu nije izrečena zaštitna mjera zabrane obavljanja aktivnosti, tri godine od dana pravosnažnosti odluke o izrečenoj zaštitnoj mjeri, izdato od nadležnog općinskog suda prema mjestu prebivališta kandidata.

Dokaz da kandidat nije osuđivan za krivično djelo, nespojivo sa imenovanjem na poziciju člana Upravnog odbora JU Kantonalna bolnica Zenica, predstavnika stručnih radnika zdravstvene ustanove, pet godina od dana pravosnažnosti presude, isključujući vrijeme zatvorske kazne (tačka 8. „Općih uvjeta za imenovanje“), Ministarstvo zdravstva će zatražiti od kandidata kojeg ministar zdravstva predloži za konačno imenovanje.

Sa kandidatima koji uđu u užu izbor komisija će obaviti intervju. Prije intervjua svaki kandidat je obavezan popuniti obrazac u kojem će iznijeti bilo koje pitanje ili mogućnost koja bi mogla dovesti do sukoba interesa u slučaju da dođe do njegovog imenovanja.

U skladu sa članom 16. Zakona o ministarskim, vladinim i drugim imenovanjima Federacije Bosne i Hercegovine, zainteresirana stranka može podnijeti prigovor na konačno imenovanje.

Prigovor se podnosi Ministarstvu zdravstva u roku od sedam (7) dana od dana dostavljanja obavijesti kandidatu o izvršenom konačnom imenovanju, a kopija prigovora se dostavlja Ombudsmenu za ljudska prava Bosne i Hercegovine.

U skladu sa članom 15. Zakona o ministarskim, vladinim i drugim imenovanjima Federacije Bosne i Hercegovine, lični podaci o podnosiocima prijave su tajni i mogu se prikupljati i obrađivati samo u skladu sa Zakonom o zaštiti ličnih podataka Bosne i Hercegovine („Sl. glasnik BiH“, broj: 49/06, 76/11 i 89/11).

Prijave sa traženim dokumentima se dostavljaju lično ili poštom na adresu Zeničko-dobojski kanton – Ministarstvo zdravstva, Kučukovići br. 2. 72000 Zenica, sa naznakom: **„PRIJAVA NA JAVNI OGLAS ZA IZBOR I IMENOVANJE DVA ČLANA UPRAVNOG ODBORA JU KANTONALNA BOLNICA ZENICA, PREDSTAVNIKA STRUČNIH RADNIKA ZDRAVSTVENE USTANOVE“**.

Javni oglas će biti objavljen na službenoj internet stranici Zeničko-dobojskog kantona, dnevnom listu „Dnevni avaz“ i „Službenim novinama Federacije Bosne i Hercegovine“.

Rok podnošenja prijave na javni oglas je 15 dana i počinje teći narednog dana od dana objavljivanja javnog oglasa u „Službenim novinama Federacije Bosne i Hercegovine“.

Neblagovremene i nepotpune prijave će biti odbačene.